

18 AUG 2003

Assad-Malaysia

SYRIA HARAP DAPAT MANFAAT DARI PENGALAMAN MALAYSIA

Oleh: Mokhtar Hussain

DAMSYIK, 18 Ogos (Bernama) -- Presiden Syria, Dr Bashar Al-Assad telah menyuarakan harapan agar negaranya mendapat manfaat melalui pengalaman Malaysia dalam merintis bidang pembangunan dan pekilangan "tanpa meminta belas ihsan organisasi antarabangsa".

Menurut laporan akhbar Syria Times, Presiden itu turut menyuarakan keinginan untuk mengadakan hubungan kerjasama yang erat dengan Malaysia, terutama dalam bidang teknologi.

Presiden itu berkata demikian dalam pertemuannya dengan Perdana Menteri, Datuk Seri Dr Mahathir Mohamad di People's Palace semalam.

Berita itu melaporkan bahawa kedua-dua pemimpin turut menekankan kepentingan pertumbuhan ekonomi dan kesejahteraan sebagai syarat asas dalam mengekalkan kebebasan politik.

Turut hadir dalam pertemuan itu adalah Menteri Luar, Datuk Seri Syed Hamid Albar, Menteri Komunikasi dan Multimedia, Datuk Leo Moggie, Menteri Sains, Teknologi dan Alam Sekitar, Datuk Law Hieng Ding, Menteri Besar Johor, Datuk Abdul Ghani Othman, Menteri Besar Perlis, Datuk Seri Shahidan Kassim dan Ketua Menteri Sabah, Datuk Musa Aman.

Pagi ini, Dr Mahathir dan isteri, Datin Seri Dr Siti Hasmah Mohd Ali melawat Masjid Ummayad di sini dengan disambut oleh Menteri Wakaf, Mohamad Ziadah.

Bangunan itu dikenal pasti sebagai "Temple of Aramaean" sebelum ia ditukar oleh Rome menjadi "Temple of Jupiter". Ia menjadi gereja dengan ketibaan penganut Kristian sehingga 635 Masehi, apabila Damsyik ditawan tentera Islam di bawah pemerintahan Khlid Ibn Al Walid.

Perdana Menteri dan isteri kemudiannya melawat sekitar Souk Hamediah (Pasar Hamediah), bazaar terkenal yang mengambil sempena nama Ottoman Sultan Hamid yang menjual cendera hati, pakaian, permaidani, alas meja, pakaian, permaidani dan barangan logam.

-- BERNAMA

MOK AHH AZH